

TE HEHEURAA API

TIURAI 1940

TE MAITIRAA I TE HOÊ EKALEZIA

NOA'TU eaha te huru o ta oe na Ekalesia, noa'tu e taata faufaa e a ore râ e taata veve oe, te ani atu nei au ia tai'o rii oe i teie mau papairaa ma te haapao maitai e te paea ore; peneia'e o te itehia te mau mea tei hinaarohia e to oe na mafatu e tei ore i tia i te hoê a'e ekalesia ia horoa mai i te reira ia oe e tae roa mai i teie nei mahana. E teie nei e faaité atu matou i te tahi mau parau o te riro ei mea faufaa roa na oe. — Ua hi'opoa anei oe i te tumu no reira maité mau haapaoraa faaroo (650 paha) o tei parau e, ua hau atu te tahi i te maitai i te tahi, e tei titau i te hopea hoê roa ra, e tei ore roa i afaro, te tahi i te tahi? Aita vau i ite e, no teihea haapaoraa faaroo oe na, e aita atoa vau i hinaaro i te mârô atu ia oe no te reira, no te mea e haere roa ia ta tatou aparauraa, area râ, e tamata vau i te faaité ia oe e, ua atea roa ratou i te mau haapiiraa a te Mesia iho, noa'tu e, te parau nei ratou e, e cherisetiano ratou. I te tau o te Mesia iho ua rave rahi te mau ekalesia, tei huru ê te tahi i te tahi i to ratou faaroo, area râ, o tei hau roa'tu i te faainohia i rotopu ia ratou ra. o te ekalesia i to ta Iesu iho i faatia ra; e i To'na faasatauroraabia, ua tauatini e ua tauatini te mau taata tei haere i nia i te mou'a no te mataitai i to'na poheraa. O taua nunaa ra, o te mau melo ia o te mau ekalesia e vai ra i te reira tau. Te mau haapaoraa faaroo, tei taa ê i to ratou faaroo e tei enemi te tahi i te tahi, ua tahoê ana'e ratou i te mana'o hoê, to ratou riri ia Iesu e i ta'na ekalesia. E inaha, i teie nei, te ite faahou nei â tatou i taua huru ra e

1900 matahiti i muri iho; oia hoi, te vai nei te hoê ekalesia tei faainohia e tei ore i itehia, e ua amui mai te tahi mau ekalesia no te patoiraa ia'na, oia hoi, te Ekalesia a Iesu Mesia i te Feia Mo'a i te Mau Mahana Hopea Nei, tei paraua-hia te ekalesia Moromona.

Peneia'e e ata outou ia faaroo outou i te reira i'oa e e tupu to outou aroha, e a ore râ to outou tâhitohito, area râ, a hi'o maitai na i te hoêraa o te huru o te mau Moromona e te mau cherisetiano matamua!

E a imi noa'i tatou, e ite ia tatou e, aita i roto i te mau haapaoraa faaroo no teie mau mahana, te mau toroa, e te faatereraa mai tei tuuhia mai e Iesu, maori râ, i roto i te ekalesia no te Feia Mo'a no te mau mahana hopea nei, e i reira outou e ite ai i te toroa peropheta, aposetolo, patereareha, orometua, haapii e te tahi atu â mau toroa.

E teie â te tahi vahi te au maitai ia haapao: Ua poro haere Iesu no Nazareta, e ta'na mau aposetolo, i te parau no te aroha, e ua haapii i tei hinaaro i te faaroo ia ratou ma te moni ore, area râ, i teie nei, eaha te mea ta tatou e ite nei? Te mau orometua, te mau perepitero e te mau haapii evanelia tei poro haere i te evanelia no te moni e noaa mai, e tei faariro i te reira ei raveraa ohipa na ratou; a iriti atu na i te reira noaaraa moni tei faariro ia ratou ei mau feia faufaa, e tei tauturu hoi ia ratou no to ratou oraraa, ei reira outou e ite ai ia ratou, te pae rahi, ia vaiiho i te ohipa evanelia no te rave i te tahi ohipa ê atu.

E inaha, te vai nei te tahi mau taata, tei maitihia na roto i te mana no te ra'i mai, tei haapii i te evanelia a te Mesia, na te ao taatoa nei, ma te moni ore. Aita roa ratou e farii nei i te hoê noa'e pene no ta ratou ohipa, area râ, e faarava ratou i ta ratou iho moni no to ratou oraraa, e eita roa ratou e farii i te hoê utu'a o te ao nei no te tusia ta ratou e rave ra; e ite ia oe i te reira huru taata i roto i te Ekalesia Moromona. Te tiaturi nei au e, na teie parau iti e faahanu ia oe i taua ekalesia ra e e faaaraara i to oe mata; area râ, mai te mea te vai ra â te mau vahi fifi no oe, a imi hohonu i taua mau parau ra ma te rave noa i te mau Parau Mo'a ei aratai e ia haamana'o i te parau a Iakobo (1:5), *Te ere ra*

te hoê o outou i te ite, e ani oia i te Atua ra, o tei horoa hua mai i te maitai i te taata atoa ra ma te patoi ore.

Ua ite au e, no te tae i te ravea e farii ai i te evanelia mau, mai tei haapiihia e te Feia Mo'a no te Mau Mahana Hopea Nei, e ia riro tatou ei mau melo no taua ekalesia ra, e mea tia roa ia ite tatou i te haavî i to tatou iho teoteo e i te parau a te mau taata. Area râ, teie o te parau atu nei ia outou, ua rave rahi te mau mea ta'na i tai'o, ta'na i ite e ua haapii atoa oia no nia i te faaroo o te mau haapaoraa e rave rahi; e ere atoa ma te aro ore te noaaraa ia'na te ite e ia farii i te opuaraa rahi no te ora, i roto i to'na nehenehe e to'na viivii ore, e te hinaaro nei oia ia paruru i te taata e tai'o nei i taua mau aroraa e taua mau imiraa rohirohi ra, na roto i te horoaraa'tu i te ite tei noaa mai ia'na.

Ia hinaaro te taata i te pauma i nia i te hoê mou'a teitei roa ra e ia haere mai te hoê aratai no te aratairaa'tu, ma te moni ore, e mea papu e farii-oioi-hia oia, no te mea, ia na reirahia, e rave rahi te rohirohi e te peapea te haapaehia, e ia ore oia ra, e mea papu eita te taata e tae i nia iho ra; no reira teie nei parau rii i papaihia'i, no te hoê â tumu, e na ratou e aratai paha, ma te papu, i te hopea tei faaitēhia mai ia tatou te e'a e Iesu Mesia. Taua aratai maitai roa ra, aita faahou Oia i nia i te fenua nei, area râ, ua horoa oia i taua ohipa ra i roto i te rima o te tahi mau taata no te rave â i taua ohipa ra, e ua faai oia i ta'na mau peropheta i to'na varua, no te mea hoê â ratou ia Mose, oia hoi ia aratai i to'na nuuaa na roto i te mau peapea o te oraraa nei e ia faatae ia ratou i te ite o te îraa o te evanelia. Ia vai te varua o te paari i roto ia outou e ia horoa oia, i roto ia outou, te hinaaro ia riro outou ei melo no taua nānā ra. Mai te mea e hinaaro â outou i te mau parau paari a'e no nia a'e i taua vahi ra, e ite outou i te reira i roto i te buka iti tei amuihia i teie nei. O nuaraa parau, e a ore râ, a ani atu i te reira i te taata o tei afai mai i te reira, e o te oaoa ia tauturu ia outou i taua vahi ra.

Ia vai noa â te hau ia outou e i roto atoa i to outou mau utuafare.

*Papaihia e Thomas E. Mc. Kay
Faaauhia ei reo Tahiti e Marcel Bonnet*

EDITORIALE

AHU na i te haana tama'i atoa a te Atua ra, ia tia ia outou ia patoi atu i te mau ravea paari a te dia-bolo ra. E ere hoi i te taata ana'e ra ta tatou e tō nei o te fe-ia hau atoa rā, e te mana, e te mau tavana o teie nei ao pou-ri, e te mau varua iino i te reva nei. A rave hoi outou i te ha-ana tama'i atoa a te Atua ra, ia tia ia outou ia patoi atu i te enemi i te mahana ino ra, e tia roa a'era ia, ia mau ā. Ia mau ma te tatuahia to outou tauupu i te parau mau, e ma te tapo'i ouma ra o te parau tia i te ahuraa; e ma te faatamaahia to outou avae i te faaineineraa o te evanelia ra o te hau; a rave hoi i te paruru ra o te faaroo, ei nia roa iho ia, o te mea ia e pohe ai te mau ihe auahi atoa a taua varua ino ra: a rave a-toa hoi i te faaupoo ra i te ora; e te 'o'e a te Varua ra o te pa-rau a te Atua: ma te pure tuutuu ore i te mau pure atoa ra, e te ani a te Varua ra, e ma te ara-tamau-muite-raa i te reira e te aniraa hoi i te maitai no te feia mo'a atoa ra. Ephesia 6:11-18.

A faaahu tatou ia tatou iho i ta te Atua—hoê ia faaararaa i faaitohia mai i to te ao nei e te hoê aposetolo i te mau tau i mutaa ihora. Mai taua tau ra e tae roa mai ia tatou nei, te tia noa ra te reira parau iti ei faaa'oraa na tatou.

Ia haamata to te ao nei i te faarue i to ratou Atua, e iri-ti ē atu Oia i to'na rima no nia'tu ia ratou, e e vaiihohia ra-tou i roto i te poiri, te tama'i, te faainoraa, e te mau tahi-raa atoa a Satane. Area, ia farii faahou te taata i to'na A-tua e ia haapae oia i te mau ohipa faufan atoa, e ia tatara-hapa oia ma te aau haehaa, i reira e tae faahou mai ai te a-roha o te Atua i nia iho ia'na ra.

Mai tei papaibia i roto i te II Nephi 4:34, No te mea na ite au e, e faahapahia oia tei tiaturi i te rima o te tino; Oia ia, ua faahapahia oia tei vai to'na tiaturirua i te taata, e uore rā, tei faariro i to te tino ei rima no'na, te huru ia o to te ao nei i teie mau mahana. Te haamo'e nei ratou i to ratou Atua e te tiaturi nei ratou i te rima tino nei, eiaha i te Atua mana hope.

E haamana'o tatou e, O te ueue i ta to'na ihora tino, o te pohe ta'na e noaa i te tino ra; e o te ueue i ta te Varua ra, o te ora mure ta'na e noaa i te Varua ra. Galatia 6:8.

TE PARAU AUTAHU'ARAA

No te Ava'e ATETE
TE MAU TAATA TUIROO O TE BIBILIA

E MAU UIRAA

1. O vai teie taata? 2. Eaha to'na toro'a? 3. Eaha te huru o to'na maitiraahia? 4. I hea ta'na ohipa i ravehia'i? 5. Eaha te ohipa i oti ia'na? 6. Ua mauruuru anei te mau taata ia'na? 7. Ua mauruuru anei te Atua ia'na? 8. E manuia anei tatou ia pee tatou ia'na? A tara mai.

Atete 4. IOANE PIPI HERE. Mareko 1:20; 9:38; 10:35-40; Mataio 4:21, 22; Ioane 1:40; 13:28; 19:26; 20:2; 21:7, 20; Te Ohipa 1:13; 3:1, 11; 4:13; 8:14; Luka 5:1-11; 9:54; 22:8; Galatia 3:9; Apokalupo 1:9.

Atete 11. IUDA ISAKARIOTA. Mataio 10:4; 26:14; Mareko 3:19; 14:10; Luka 6:16; 22:3; Ioane 6:71; 12:4; 13:2, 26; Te Ohipa 1:16, 25.

Atete 18. PAULO. Te Ohipa 7:58; 8:1, 3; 9; 11:26-30; 13:1-14; 15, 16, 17, 18, 21, 27, 28; Galatia 1:13; 2:1-10; II Korinetia 11:32.

Atete 25. A haapii atu i te parau no na Haapii Hahaere no te ava'e i mua, mai tei papaihia i roto i te ve'a no te ava'e no Atete.

Na Te Mau Maapii
Mahaere na te Mau Utuafare

IA HAERE TATOU I TE MAU PURERAA E TIA'I

Eaha te faufaa ia haere tatou i te mau pureraa? E ere anei ia i te mea maitai ia faaea noa tatou i te fare i te mau Sabati? Eaha ra te faufaa mau? Ua hanere to tatou mau melo tei ore i tae i roto i te fare pureraa no na matahiti e rave rahi. No te aha? Te faaite mai ra te hoê, *No to'u faatau rahi.* Te na ô mai ra te tahi, *E faito noa to'u maitai i to te mau melo atoa o tei haere noa i te pureraa.* E ta te tahi, *Aita roa vau e au i te mau faatere,* e ta te tahi atu, *E peapea rahi to'u i to'u taata-tupu.* E mau tumu maitai anei teie? Ia feruri rii tatou i taua mau tumu nei, tataihoê.

E faatau to te hoê taata. E mea au anei na tatou ia parau mai te Fatu e, *E ere oe i te hanahana no to oe faatau?*

(A hi'o te tuatiraa i te api 120)

TE SOTAIETE VAHINE TAUTURU

No te Ava'e ATETE

Irava tamau aau: Mosia 26: 21

E o tei faaroo i to'u ra reo e riro oia ei mamoe na'u; e e farii oe ia'na i roto i te ekalesia, e e farii hoi au ia'na.

Mahana Maha (Matamua)

Mahana iritiraa mana'o e te himene na te mau tuahine.

Parau tumu no na Tuahine Hahaere: Te Faaroo.

A tai'o ratou i te Alama 44:4; Mataio 17:20; 21:21.

Mahana Maha (Piti)

ALAMA (Te Metua)

E huaai mau o Alama no Nephi, te tamaiti a Lehi. E ta-vini faauruhia oia na te Fatu, e ua riro oia ei aratai rahi e ei orometua i rotopu i to'na mau taata.

Mosia 17:1-4; 18:7-17; 18:18-30.

Mahana Maha (Toru)

Ua riro Alama ei taata tei faatia i te Ekalesia. Mosia 23: 9-22; 25:14-24.

Mahana Maha (Maha)

Ua farii Alama i te faaa'o no o mai i te Fatu ra. Mosia 26:8-39.

Te poheraa o Alama. Mosia 29:45.

Mahana Maha (Hopea)

Mahana raveraa ohipa na te mau tuahine.

Ua tae i te tau, te fatata mai nei te basileia o te Atua; a ta-tarahapa, a faaroo mai i te evanelia nei.

Mareko 1:15.

TE HAAPIIRAA SABATI

No te Ava'e ATETE

PUPU PARAIMERE

Irava tamau aau: *II Salamo 51:14*

Ia ora vau ia oe i te hara toto ra, e te Atua e, te Atua e ora'i au nei; e na tau vaha e himene pii hua i to oe ra aroha.

Atete 4. Te tamaiti pirioi i te amuraa maa a te arii. II Samuela 9.

Atete 11. Ta te peropheta aamu no te mamoe. II Samuela 11:1-25; Salamo 51.

Atete 18. To Abasoloma eiâraa i te basileia. II Samuela 13:1 e tae noa'tu i te 17:23.

Atete 25. Hi'opoaraa.

PUPU PITI

Irava tamau aau: *I Samuela 13:13*

E mea tia ore ta oe i rave; aita oe i haapao i te parau a to Atua ra a Iehova, ta'na i parau mai ia oe ra: ahiri hoi oe i na reira, ua haamau roa ia Iehova i to oe mana toroa arii ra i nia ia Iseraela e a muri noa'tu.

Atete 4. Samuela e te parau no te hoê arii. I Samuela 3, 7, 8.

Atete 11. Saula te Arii. I Samuela 11.

Atete 18. Davida te taata himene no Iseraela. I Samuela 13, 14, 16.

Atete 25. Hi'opoaraa.

PUPU TORU e te MAHA

Irava tamau aau: *Genese 34:10*

E e parahi mai outou i o matou nei; tei mua i to outou aro teie nei fenua, a parahi, e e hoo, e ia tao'ahia ta outou i o nei.

Atete 4. Te fanauraahia o Iosepha e to'na hooraahia. Genese 30:1-25; 37.

Atete 11. To Iosepha faateiteiraahia i te utuafare o Potiphar, e i roto i te tapearaa. Genese 39, 40.

Atete 18. Na taoto a Pharao ra, e te faalteraahia e Iosepha ra. Genese 41.

Atete 25. Hi'opoaraa.

TE FEIA API



No te Ava'e ATETE

Irava tamau aau: *Luka 21:33*

E mou te ra'i e te fenua, e ore râ ta'u nei parau e mou.

Atete 4. UA HO'I IESU I TE HIERO I TE M'U MAHANA ATOA. Mataio pene 21 e te 22; Mareko 11:15-17; Luka 19:45-48.

Atete 11. I TE HAERE-FAAHOU-RAA I IERUSALEMA. Mataio 20:17-34; 21:1-11; Mareko 10:32-45; 11:1-11; Luka 18:31-34; 19:1-44; Ioane 12:12-19.

Atete 18. TE FAAOTIRAA I TA TE FATU MAU OHIPA I ROTOPU I TE MAU TAATA. Mataio pene 22 e te 23; Mareko 12; Luka 20:19-44; 21:1-6.

Atete 25. TE MAU PARAU Â A IESU I TE TINO AHURU MA PITI. Mataio 24; 25:31-46; Mareko 13; Luka 21.

TE HAAPIIRAA PARAIMERE

No te Ava'e ATETE

Irava tamau aau: *I Korinetia 2:9*

O te mau mea aore i hi'ohia e te mata ra, aore i faaroohia e te tari'a ra, aore hoi i ô i roto i te aau o te taata ra, o ta te Atua ia i vaiiho no te feia i hi-naaro ia'na ra.

MAHANA MAHA (MATAMUA)

Te Vahine e Ta'na Moa Poria

E Moa ta te hoê Vahine ruan o tei ofaa i te hoê huero moa i te mau mahana atoa. Parau atura oia, "E mea maitai roa, area râ e mea hau a'e ahiri e piti huero ta'na e horoa mai na'u. E faarahi au i te paruraa ia'na i te tô papaa, peneia'e, ia tae i te taime, e ofaa mai oia e piti huero i te mahana hoê."

Rave ihora oia mai ta'na i parau ra; area, ei mono i te o-faaraa mai e piti huero i te mahana hoê, mai ta'na i tiatuni, poria roa'tura ta'na Moa, e no te rahi o to'na poria, faaea roa'tura oia i te ofaa mai i te huero.

E rave rahi te taime, i to tatou oraraa, e faaino tatou i te hoê mea maitai a tamata'i tatou i te haamaitai roa'tu i te reira.

MAHANA MAHA (PITI)

Te Taata Auau Puaa Oviri E Te Taata Hamani Iri Puaa

I te hoê mahana, haere atura te hoê Taata Hamani Iri Puaa e farerei i te hoê Taata Auau Puaa no te hoo mai i te hoê iri bea, e aufau atura oia i te moni no te reira. Na ô maira te Taata Auau Puaa, "E haponu atu vau te iri ananahi i te poi-poi, no te mea aita te reira ia'u i teie nei, e haere au e pupuhi i te bea ananahi ia poipoi."

No te puai o to te Taata Hamani Iri Puaa hinaaro ia mataitai i te hoê auauraa bea, haere atura oia, i te poipoi roa, i te Taata Auau Puaa oviri, e haere atura raua i te vahi tei reira te bea i te taotoraa. E i to raua taeraa i te auvaha o te hoê ana, tono atura te Taata Auau Puaa i ta'na mau uri i roto i te ana a pauma'i te Taata Hamani Iri Puaa i nia i te hoê tumu raau, tei fatata mai, no te mataitai i te pupuhiraahia o te bea.

Horo maira te bea i rapae i te ana e tei muri noa iho te mau uri ia'na. E mea fatata roa te Taata Auau Puaa, tei nia iho mau i te e'a o te bea. Pupuhi atura oia i te animala e aita i tano; e te bea, no to'na ru ia horo, ô maira i nia i te Taata Auau Puaa tei topa. Vai noa'tura oia i raro, mai te te hoê ofai, ma te ri'ari'a i te huti i te aho. Ho'iho'i maira te bea ia'na, faaati maira na pihaiho, e mana'o ihora e, e taata pohe, haere atura i roto i te uru raau.

I te mo'e-roa-raa te animala, pou maira te Taata Hamani Iri Puaa e tauturu atura oia i te Taata Auau Puaa ia tia mai i nia. Parau atura oia ia'na, "Ua ite au i te bea i te parau-mârû-raa i roto i to oe na tari'a, eaha ta'na i parau mai ia oe?"

Pahono maira te Taata Auau Puaa, "Ua parau mai oia ia'u e, ia ara maite au, i te mau tau i mua nei, ia pohe iho â te bea hou to'u hooraa i to'na iri."

Eiaha roa outou e fafau i te hoê faufaa mai te mea aita i papu ia outou i te haapao i te reira.

MAHANA MAHA (TORU)

E Faaoraraa Maere Mau

Te vai ra te hoê taata, o Toma to'na i'oa, e piti ta'na tamarii, hoê tamahine e hoê tamaroa iti, e e mea pinepine raua i te haere i roto i te faaapu tô papaa, tei atea i te fare i te hoê kilometera e te afa, ia tia ia raua ia ho'i mai i te fare na nia i te pereoo. E e mea pinepine roa to to raua papa aratairaa ia raua i te poipoi ia ho'i mai raua i te avatea na nia i

te pereoo tei i te tō papaa. I te taeraa i te hoê mahana piti, i te avatea, i muri a'e i to raua mo'e'aa, ua imi to raua mama ia raua e ua ui haere i te mau fare i fatata mai, e no to'na iteraa e, aita raua i reira, mana'o ihora oia e, ua haere raua i to raua metua tanera no te faatomo-faahou-raa i te pereoo.

I te toparaa o te poiri, haaputuputu atura te mau taata, no te mea e mahana piti pureraa te reira, e i te taeraa mai o te papa, o oia ana'e, aita na tamarii i pihaiho ia'na.

Parare atura te roo e, ua mo'e na tamarii mai te avatea mai â, i reira haaputuputu maira te mau taata atoa e te mau taure'are'a o te oire no te haere e imi i taua na tamarii ra.

Ma te rama paina i te rima, parare atura ratou na roto i te mau aua faaapu. Haere atura ratou i tera, e i tera vahi, e haere roa'tura ratou i te atea a rurutaina noa'i te mau taure'are'a i te ûâ o te mau uri oviri.

I te paura o na hora e piti ho'i maira te tahi pae taata i te fare tei reira te mau ruau i te haaputuputuraa no te pure ei tautururaa i na tamarii ra.

O Mose Curtis ra, te tia noa ra oia ma te huru ê i nia ia'na, e a pure noa'i oia ra, faaroo ihora oia i te hoê reo tei parau mai ia'na, "E Mose, a haere haavitiviti i te pae o te hitia o te râ!"

Hi'o atura oia na pihai iho ia'na, e aita e hoê taata. Ua maere roa oia. Parau faahou maira taua reo ra, "A haere haavitiviti i te pae o te hitia o te râ! Eiaha oe e aratai i te hoê a'e taata. A haere, a haavitiviti!"

Aita hoi te hoê taata i pihai iho ia'na. Faaroo faahou iho-ra oia i taua reo ra, no te toru ia o te taime, na mua a'e i te ho'iraa mai o to'na huru mau, ua haru oia i ta'na pupuhi e haere atura.

Mai te oioi tei au ia'na i roto i te poiri, ua haere oia ma te puai rahi, a farara noa'i oia i roto i te faaapu e ma te pure i roto ia'na.

I to'na taeraa i roto i te tahi atu faaapu tō papaa, hoê kilometera e te afa i te atea i te fare, otemu ihora oia i te faarooraa i te hoê uuru, e i to'na noa iho pae avae te tarava noa ra te tamahine iti.

Rave ihora oia ia'na i nia i to'na ouma e ani atura oia e, teihe'a to'na tuane iti. Paho no maira taua tamahine iti ra e, "Ua reva ê ana oia i te fare."

I na hanere metera i nia i te e'a e haere atu ai i te fare, a ho'i ai oia ra, u i hora to'na avae i nia i taua tamaiti ra no te rahi o te poiri, te tarava noa ra i roto i te faaapu, ua varea roa i te taoto. No te mea ua faaau ratou na mua a'e e, ia itehia na tamarii e faaharuru i te pupuhi, ua na reira oioi oia ra.

Aita i maoro i muri iho, tae maira te tauturu e tae oioi atura na tamarii ra i roto i te rima o to raua metua vahine, a tae mai ai i roto i te mafatu o Mose Curtis te faaite-papu-raa.

MAHANA MAHA (MAHA)

E Aamu Inidia

I te tau mahanahana no te matahiti 1832, itehia'tura, i roto i te oire St. Louis, e oire nainai i nia i te mau otia i te reira tau, na Raatira Inidia e maha tei rohirohi roa no to ratou tere roa. Faaite maira ratou e, ua faaroo ratou i te parau no te "Hoê Buka na te Taata Uouo no te ra'i mai," e ua haere mai ratou no te imiraa i te reira.

Farii maira te Tenerara Tarati ia ratou ei manihini na'na e ua horoa oia i te mau mea atoa e au na ratou. Ua faatiahia te tahi mau fare tiahapa i nia i te matie i roto i taua oire, e ua parahi ratou i reira. Aita i maoro i muri iho pohe atura na Raatira e piti. E na mua a'e i te ho'iraa o na Raatira i toe ra, o Tiaa Iri Rapiti e o Upoo Ma Te Tara Ore, i to raua nunaa ra, i te tooa o te râ ra, ua faatupu te Tenerara Tarati i te hoê tamaaraa na raua. E ua parauhia e, ua na ô mai te hoê o raua i te reira taime:

"Ua haere mai au ia outou na nia i te aratia i na ava'e e rave rahi, mai te tooa o te râ mai. O outou te mau hoa o to matou mau tupuna tei reva a'enei na te e'a rahi ra. Ua haere mai au i ô nei ma te hoê mata huru araara ia noaa mai ia'u te maramarama no to'u nunaa o te parahi noa ra i roto i te poiri. E ho'i atu vau ia ratou ma to'u na mata e piti i te piriraa. Nafea vau i te ho'i matapo atu i to'u nunaa matapo ra? Ua haamata vau i to'u tere ma te rima puai, e ua haere mai au na rotou i te mau enemi e rave rahi e te mau fenua huru ê, ia tia ia'u ia faahoi atu ia ratou i te Buka a te Taata Uouo no Te Ra'i Mai. E teie nei te ho'i atu nei au ma te rima fatifati.

"E ho'i au ma te ere i nia i te aratia e tae atu ai i to'u nunaa i roto i te fenua poiri. Te faateiaha nei outou i to'u nau avae i ta outou mau horoaraa e e ruauhia to'u na tiaa i te amora ia'u, area, taua Buka ra, aita ia i roto ia ratou. Ia parau atu vau i to'u nunaa i roto i te apooraa, ia pau faa-

hou te hoê tau toetoe, e aita taua Buka ra ia'u, eita te hoê parau e parauhia e te mau ruau e te mau aito apî. E tia ratou tataitahi e e haere i rapae. E pohe ia to'u nunaa i roto i te pōiri e e haere ratou na te e'a e tae atu ai i te vahi auanraa puaa oviri. Eita te hoê taata uouo e haere e o ratou atoa e eita ia e vai te hoê buka na te taata uouo no te faaite-maitairaa'tu i to ratou e'a. Aita'tu ta'u e parau faahou."

Aita roa te Tenerara Tarati i ite ra e, eaha te mea ta'na e parau ra. Ua farii hoi ratou i te Bibilia e te mau haapiiraa o te Bibilia, area, aita te reira i navai.

Mai te au i to tatou ite e mai te au i te hurn o te farii-raa-hia o te Buka a Moromona, e te tahi mau Inidia, te parau no to ratou mau tupuna, e mea tia roa ia tatou ia mana'o e, o te Buka a Moromona ta taua mau aito ra i haere e imi haere no te afairaa'tu i to ratou nunaa.

MAHANA-MAHA (HOPEA)

Na te orometua iho o te Paraimere e maiti i te hoê haapiiraa au maitai no te reira mahana.

NA TE MAU HAAPII HAHAEERE NA TE MAU UTUAFARE

(E tuatiraa teie nei parau)

E teie tumu: *E faito to'u maitai i to te mau taata atoa o tei haere noa i te pureraa.* Te faaite mai ra Iesu e, o tei hinaaro ia faateiteihia, ia riro oia ei tavini na te mau taata atoa e tia'i. E o tei tamata i te faateitei ia'na iho, e faahaehaahia ia, eiaha paha no'na iho, e faahaehaahia râ. Mai te mea e, te vai ra te taata i rotopu ia tatou o te ore e tia ia haapii-faahou-hia, ia riro ia oia ei orometua no tatou e maitai ai.

Aita vau e au i te mau faatere. Aue te maamaa o taua tumu ra! Na tatou anei teie ekalesia, e a ore râ, na te Fatu anei? E tiaraa anei to tatou ia parau e, aita te Fatu i maiti mai te paari? Mai te mea e, e hape to te mau faatere, eiaha tatou ia peapea no te reira. Eita tatou e faautu'ahia no te hape o te mau faatere. Na te Atua e haapao ia ratou i to'na tau mau.

E peapea to'u i to'u taata-tupu. E homa, e tumu maitai roa teie no to tatou haereraa i te mau pureraa, eiaha no te faaearaa i te fare. E tia paha ia tatou, na roto i to tatou tairururaa i te pureraa, ia tamâ, e ia haamaru i to tatou mana'o e to tatou aau; e to tatou taata-tupu, i te iteraa mai ia tatou e na reira atoa oia. E ere te mau pureraa no te feia parau-tia ana'e. Aita hoi te Mesia i haere mai no te aniraa i te feia parau-tia ia tatarahapa, area no te feia parau-tia ore.

No reira, ia faai tatou i te fare pureraa, ia faaite tatou i te Fatu i to tatou mauruuru no te mau haamaitairaa rahi e roaa mai nei e o te roaa mai ia tatou i te ao a muri atu, no to tatou meloraa i roto i ta'na ekalesia.

Ia Tatarahapa Tatou E Tia'i

FAARUE te paieti ore i to'na haerea, e te taata parau-tia ore i to'na mana'o; a ho'i ai oia ia Iehova, e na'na oia e aroha mai; e ho'i i to tatou Atua, te rahi ra hoi ia'na te faaore i te hara. Isaia 55:7.

Te vai nei te hoê mea ta tatou e imi nei, e te hoê mea rahi i hinaarohia e te mau taata atoa; e o teie nei mea o te mea ia tei rahi i te faufaa e te rahi ia tatou, oia hoi, o te ora mu-re ore ia i roto i te basileia o to tatou Atua.

O te hoê taahiraa rahi i roto i to tatou imiraa i te ora mu-re ore, tei faaite-papu-hia mai ia tatou, o te tatarahapa ia, no te mea ua faaite-atoa-hia mai ia tatou e, aore roa te mea vii-vii e tae i roto i to'na basileia, e no reira, ua tia roa ia tamâhia ta tatou mau hara e ia mâ maitai tatou no te tomoraa i reira ra. Hoê noa iho ravea e vai nei ia mâ ta tatou mau hara, oia hoi, na roto hoi i te tatarahapa.

Te na ô maira te aposetolo ra o Ioane, *Ia parau tatou e aita a tatou e hara, te haavare nei tatou ia tatou iho, e aore te parau mau i roto ia tatou nei.* I Ioane 1:8. E no reira, e mea tia ia tatou atoa ia tatarahapa.

Na roto ana'e i te aroha rahi o to tatou Fatu, e to'na taraehara no tatou atoa, te vai nei to tatou ravea ia faaorehia ta tatou mau hara, na Iesu iho i faaite mai, oia hoi, te tatarahapa mau. Eaha te huru o te tatarahapa mau? Ua faaite-atoa-hia mai te reira ia tatou nei, oia tei tatarahapa ma te aroha i roto i to'na aau, e o oia tei faaite i ta'na mau hara e tei faarue i te reira no te raveraa i te maitai. Ua tia atoa ia'na ia faaroo, e faaorehia ta'na mau hara, e no reira te ite nei tatou e, ia na mua te faaroo e te tatarahapa. Aore atoa e faufaa no te faaroo ma te tatarahapa ore.

Te faaite mai nei te mau parau mo'a a te Atua e, *Te vai nei te mau taata ia noaa to ratou oaoa* (II Nephi 2:25), e aore roa e tia i te taata ia noaa ia'na te oaoa mau ia vai noa te hara i roto ia'na, no te mea, na te hara i haaviivii i te taata. Ia ore ia tia i te taata ia faarue i ta'na mau hara, ua riro ia oia ei tavini na taua mau hara ra, e te mau nei oia i roto i te tapearaa rahi a Satane.

E no reira, e homa, a faaitoito tatou i te faarueraa i te mau hara, ia ore tatou ia mau i roto i te rima o Satane e ia ume-hia i raro i hade.

Papaihia e Iosepha G. Stevens

E Teie Hoi Te Ora Mure Ore

TE hinaaro nei anei outou ia ô i roto i te basileia o te Atua, e ia roaa ia outou te ora mure ore? Oia. No reira, ia haapao tatou i te mau faaueraa atoa ta te Atua i tuu mai na tatou. Ua faaite mai Iesu ia tatou, *Teie hoi te ora mure ore, ia ite ratou ia oe i te Atua mau ra, e ia Iesu i te Mesia i ta oe i tonono mai.* (Ioane 17:3)

Ia haamata tatou i te tavini i te Atua i to tatou apîraa e tia'i no te mea, te reira te taime maitai a'e na tatou ia imi-mi tatou i te parau mau e ia pee i muri ia Iesu. Te na ô maira Iesu, *O vau te e'a e te parau mau e te ora, aore roa e taata e tae i te Metua ra, maori râ ei ia'u.* (Ioane 14:6)

Ua tae mai tatou i te ao nei ia tupu tatou i te ite i te maitai e te ino. E ua ite tatou e, teie nei oraraa o te taime ia e au no tatou ia faaineine ia tatou iho. Mai te au i tei papaihia i roto i te Maseli 1:7, *Te matamua o te paari mau ra, o te mata'u ia ia Iehova; o te paari mau ra e te a'o ra, o tei vahavahia ia e te maamaa.* No reira, ia haapao tatou i taua parau ra, aita ia tatou e faaroaroa i te mahana o to tatou tatarahapa e tae roa'tu i te hopea. Inaha hoi, ia faaroaroa tatou i te mahana e tatarahapa'i tatou e ia tae atu ai i te pohe, e riro tatou ei mau tavini o te varua o te diabololo.

O te mau taata atoa o tei bapetizohia i roto i te Ekalesia, e auraro ratou i te fafauraa a te Atua. E ia haapao noa ratou i te ture a te Atua e maitai ai, e ia na reira ratou, e riro ia ei melo no te Ekalesia a te Matahiapo, e e noaa ia ia ratou te îraa o te hanahana o te Atua, to ratou Metua.

E mea faufaa anei ia noaa te reira? Aore roa e tia ia roaa te reira ma te ohipa ore, e aore hoi ma te ite ore i te mau mea a te Atua. Area râ, e rave rahi te mau tamarii a te Atua, o tei mairi i roto i te ohipa ino. E faatia noa ratou ia ratou iho no ta ratou mau peu ino ma te mana'o e, aita te Atua e peapea no ta ratou hara iti. E mea ohie roa ia topa i roto i te hara e te ohipa a Satane.

Eaha, e mana'o anei tatou e, e mâ to tatou tino i roto i te apoo e e tae tatou ma te tino porao ore i te mahana tia-faahou-raa? Eiaha tatou e mana'o mai te reira, e faautu'ahia tatou mai te au i ta tatou ohipa e to tatou ite. Mai te au i te parau a Alama i parau atu i ta'na tamaiti, Alama 41:14,15, *E tena na, e ta'u tamaiti, ia aroha oe i to mau taeae; a tuta oe ma te parau au, a faautu'a oe ma te parau-tia, a rave oe i te maitai ma te tuutuu ore; e ia rave oe i teie nei mau mea, e roaa*

ia te utua ia oe; oia ia, e faaho'i-faahou-hia te aroha ia oe ra, e faaho'i-faahou-hia te utua parau-tia ia oe ra, e faautua-faahou-hia hoi te maitai ia oe ra. O ta oe e haponu atu, e ho'i ia ia oe, e e faaho'ihia; e tena na, na te parau ra, e faaho-iraa, e faahapa maite i te taata hara, e ore roa oia e faatia-hia e ho'e iti a'e.

Ia haapao tatou i te mau ture a te Atua ma te aue ore, e ia pee na muri ia Iesu ma te tuutuu ore, e ninii ia oia i to'na ra varua i nia iho ia tatou no te horoaraa i te paari, te ite e te mana. Ia riro te itoitoe e te aroha ei aratai no tatou, e ite ia tatou i te e'a e tae atu ai i te ora mure ore.

Papaiahia e Etera Taft Benson, Jr.

E Tamaiti Oe Na Te Atua

I muri a'e i to Iesu baptizoraahia ua faauruhia oia e te Varua ia haere i te medebara. I reira, ua faafatata oia i to'na aau e to'na varua i to'na Metua i te ao ra na roto i te haapaeraa maa e te pure. Ua mairi na mahana e maha ahuru a noho ai Oia i reira, tae maira Satane ia faahema la'na, ite iho oia e, ua paruparu roa to Iesu tino no to'na haapae-maoro-raa i te maa, e ua tamata oia ia'na ma te parau, *E Tamaiti oe na te Atua ra, a parau i teie nei mau ofai ia riro ei mau.*

Aue te paari o Satane! Te tamata ra oia ia faatupu i to Iesu feaa i te mea e, e Tamaiti Oia na te Atua e i te reo ta'na i faaroo i te taima no to'na baptizoraahia, tei na o mai e, *O Tau Tamaiti here teie, ua mauruuru roa vau ia'na.*

Ua feaa anei Iesu i to'na vai-au-Atua-raa i te Atua Metua? Aita ia. E ite tatou i te reira i ta Iesu pahonora'a tu ia Satane a na o atu ai oia ra, *Ua papaihia, e ore te taata e ora i te maa ana'e ra, i te mau mea atoa ra i haapaohia e te Atua.* Ua haavi Iesu i ta Satane faahemaraa matamua.

I muri a'era ua aratai Satane ia Iesu i te oire mo'a, faatia iho ia'na i nia i te poretiko o te hiero ra. Ua parau maira oia ia'na, *E Tamaiti oe na te Atua ra, e haamairi oe ia oe iho i raro: ua papaihia hoi e, E poroi oia i ta'na mau melahi ia oe, na ratou hoi e mau i to ratou rima, o te tiaia noa' tu*

to avze i te ofai. I teie nei, te tamata ra Satane ia faahema Ia'na ma te parau e, *Ua papaihia hoi e.* Ua pahono râ Iesu ma te parau ra e, *Ua papai-atoa-hia e, Eiaha oe e aa i to Atua ra ia Iehova.* Ua haavî faahou Iesu i ta Satane faahemaraa no te pitiraa o te taime.

Te toruraa ra o ta Satane faahemaraa, ua faahuru ê oia i ta'na raveraa. Ua faahema oia ia Iesu i te mau mea o teie nei ao tahuti nei. Aita roa oia i faahua i to'na hinaaro. Ua aratai oia ia Iesu i nia i te hoê mou'a teitei. I reira ua faaitē oia Ia'na i te mau oire e rave rahi, te mau ô vine, e te mau nănă puaatoro; na roto i te hoê orama ua faaitē oia ia'na i te mau basileia o teie nei ao, to ratou faufaa e te hana-hana tahuti hoi. I reira Satane i parau ai e, *E horoa'tu vau i teie nei mau mea atoa ia oe ia tipapa mai oe i raro e haamori mai oe ia'u.*

A hi'o na tatou i te huru o taua faahemaraa ra. Na roto ia Iesu i hamanihia'i te mau mea atoa o teie nei ao, I teie nei râ, te hinaaro ra Satane ia auraro Iesu ia'na ra e ia horoa mai ia'na i te hoê tufaa o te mau mea tei hamanihia na roto ia Iesu. Ahiri tei raro Iesu ia Satane, ua faaorehia te opuaraa paari a te Metua, e ua riro ia te apooraa rahi i te ra'i ra ei faufaa ore.

Aita râ Iesu i farii i taua faahemaraa ra. Ua haamamu Oia ia Satane ma te parau e, *E haere e oe, e Satane; ua oti hoi i te papaihia, o to Atua o Iehova ta oe e haamori, e oia ana'e ra ta oe e faaroo.* Ua haere ê atu Satane, e ua haere mai Iesu mai roto mai i taua na ata-poiri-faahemaraa e toru. Ua riro te rê ia'na i nia ia Satane, aita râ ta Satane mau faahemaraa i faaorehia i reira, area râ, ua ite tatou e, ua tamau noa Iesu i te parau-tia e tae noa'tu i te hopea.

Ia na reira tatou i te peeraa i muri la'na; eiaha tatou e hinaaro i te mau mea faufaa ore o teie nei ao; eiaha tatou e faaooo i te Atua, a tamau â râ tatou i te mau mea maitai e te paran-tia.

Ia ora noa outou i te aroha rahi o ta tatou Fatu here o Iesu Mesia.

Papaihia e Rutena O. Allred

Ua
bati, i
I te
Te a
te mau
maa.
no out

Uela r
Nile r
Re rau
Etera
Viliam
Petaro
Farani
Rui ra
Ar
Horate

Te p
purera
mau hi
na'o râ
rea tat
roto i t
vahi at

Te fa
ra, e e
A haan
rea.

PAPI
ho'a, E
utuafar
I te r
te vahi
te hopu

Ua h
hoê har
ti hane
tairaa i

PARAU API NO TE MISIONI

Ua tae mai te parau no Nihiru e, i roto i te hi'opoaraa no te Haapiiraa Sabati, ua riro te rê i te *Pupu Paraimere*.

I te amaa Papeete ua riro te rê i te *Pupu Piti* e te *Pupu Maha*.

Te anihia'tu nei te mau amaa atoa ia haponu mai i Papeete i te faaiteraa no te mau hi'opoaraa e no te mau ohipa maitatai atoa e ravehia nei i te mau amaa. Na outou hoi teie Ve'a, no reira i hinaarohia'i ia tuuhia te parau apî no outou i roto i te reira.

Teihea te mau orometua papaa ?

Uela raua o Lavana - Ua reva'tu i Marite.

Nile raua o Viri - Tei te mataeinaa no Tahiti.

Re raua o Tere - " " " "

Etera raua o Noromana - Tei Niau.

Viliamu raua o Melevina - Tei Nihiru.

Petarona raua o Eledona - Tei Ragiroa.

Farani raua o Ri - Tei Huahine.

Rui raua o Setanela - Ua faaea raua i rotupu i te Feia Mo'a i Nukutavake,

Amanu, Vahitahi, e Hao, e i teie nei, te faaea ra raua i Hikuera.

Horate, Rutena, Ioane, e Teina - Tei Papeete.

No to tatou mau Pureraa no te Feia Apî

Te parauhia nei, e te tahi mau taata e, ua rahi roa te maniania i roto i te pureraa i te pô Sabati. E tupu iho â to tatou oaoa e te hinaaro ia ata no te mau himene oaoa e te mau parau ananatae te parauhia i reira. Ia haamana'o râ tatou i teie, ei haamana'oraa i te Atua, e mea tia ore roa ia faaareare tatou ia tatou iho i roto i te mau pureraa. Ia faatura tatou i te Atua na roto i te haapaoraa ia tatou iho e tia'i. E taime to te mau mea atoa nei, e te vahi atoa. Ia haapao tatou i te taime e te vahi atoa.

Te faaite mai ra te parau no Tubuai, e mea maitai roa te mau ohipa i reira, e e mea itoito hoi te Feia Mo'a, noa'tu te taivaraa o te hoê mau taata. A haamana'o tatou atoa e, e tiamâ to te taata atoa ia maiti i to'na iho hae-rea.

PAPEETE. I te mahana hopea no Me, ua faaterehia te hoê haapiiraa hoho'a, *Esetera*, te *Arii Vahine*, ei faaturaraa ia Setefano Peresideni e to'na utuafare, o te reva vave i Marite.

I te mahana matamua no Tiunu ua haaputupu to te amaa atoa i Arue, i te vahi hopuraa miti. Ua faaea ratou i reira no te taatoaraa o te mahana, i te hopuraa i te miti e i te hautiraa i te tahi mau hautiraa.

TE MAU PARAU APÎ

Ua hamanihia te hoê machine neneiraa hoho'a te nenei i na hoho'a e hoê hanere e piti ahuru tausani i te setoni hoê, oia hoi, e hitu milioni e piti hanere tauatini hoho'a i te minute hoê. E flu paha te taata i te mataitairaa i te hoho'a.

Ua itea-papu-hia i teie nei, mai te mea e ravehia te toto o te hoê animala, tei varea roa i te taoto no te rahi o te 'na rohirohi, e ia pamuhia te reira i roto i te hoê animala maitai, eita e maoro, e varea-atoa-hia teie nei animala i te taoto rahi.

Ua faaite mai te hoê taata paari e, o te reo Farani tei hau atu i te oioi i te mau reo atoa o te ao nei; e e parauhia te reira i na ta'iraa reo e 250 i te minute hoê; o te reo Tapone te haere mai na muri ma na ta'iraa reo e 310 i te minute hoê; e i muri iho, te reo Eremani ma te 250 ta'iraa reo; e te reo Baratane ma te 210 ta'iraa reo i te minute hoê. Te vai nei te tahi mau reo, no teie mau paeau moana nei, tei taere roa, e e parauhia ratou i na ta'iraa reo e 50 noa iho i te minute hoê, i roto i te aparauraa.

I te matahiti 1831, ua tupu te hoê mata'i rahi tei afai i te hoê vahi repo, tei tae i te faito ra e 75 kilo, i te 285 metera i te atea, e te tahi atu vahi repo, tei fatata i te 200 kilo, i na metera e 35 i te vahi repo matamua ra (550 metera). Ua faitohia te tere o te mau mata'i puahiohio, e ua itehia e, e tae ratou i te tere ra e 240 kilometa i te hora hoê, e te tahi mau pape, i roto i te mau mata'i rahi, e tae ia ratou i te tere ra e 400 kilometa i te hora hoê.

Noa'tu e, e ere te reira i te mea ohie ia ratou, e tae te moora ereere i te hohonu ra e toru metera, i raro a'e i te pape, no te imiraa i ta ratou maa.

Ua hamanihia e ua faaotihia te hoê neneiraa hoho'a api, no te neneiraa i te hoho'a i raro i te vahi moana, e tae noa'tu i te hohonu ra e toru tapatini e e hitu hanere metera.

Ia faatano-maitai-hia to ratou tereraa i nia i te mata'i, e tae te mau pahihia taie, te faaterehia na nia i te pape paari, i te hoê tere tei hau atu i te mata'i te faatere ia ratou ra.

Te vai nei i te tahi fenua mahanahana te hoê tuturahonui rahi roa te tae to'na mau avae, ia haamahora-maitai-hia, i te faito ra e piti ahuru centimeta e te afa, i ropu i te menemeneraa. Te vai atoa nei, i te tahi mau fenua moana, te hoê huruioire pererau tei tae to ratou pererau i te hoê metera e te afa i te roa.

Ua tomo te Pharao ra o Shisak, no te 22 o te u'i, i roto i te hiero o Solomona, i Ierusalema, e afai atura oia i Aiphiti i te auro e te ario no roto mai i te reira ra. I teie nei râ, ua itehia, e te hoê taata Farani, te menema hauti-ore-hia o taua Pharao ra o Shisak, e tei roto i te reira te hoê hoho'a mata o taua arii ra, tei hamanihia i te auro ra, e te tahi atoa mau afata auro e te ario, e te rahiraa o taua auro e taua ario ra, o tei faatahehia ra, no roto mai ia i te faufaa i ravehia mai i te hiero o te ati Iuda ra.

Marcel Bonnet, Gérant
Kenneth R. Stevens, Imprimeur

O. Rudeen Allred, Éditeur de la Mission
Ralph J. Richards, Assistant Éditeur

Neneihia e te MISIONI TAHITI no te Ekalesia a Iesu Mesia i te Feia Mo'a i te Mau Mahana Hopea Nei. Orovini, Papeete, Tahiti.

Te hoo: e 5 farane i te matahiti; e 10 farane no na matahiti e toru.